


# surat popular la'õ hamutuk




instituto ba analiza no monitor rekonstrusaun iha Timor Leste

## justisa iha nebe?

Timor-Leste livre husi okupasaun Indonesia ba tinan lima ona, maibe prosesu Justisa kona ba krimes kontra humanidade mak akontese durante okupasaun sei fraku hela.

Responsabilidade ba justisa laos deit Timor-nian, maibe mos komunnidade internasional nian, hanesan ONU, no mos governu sira seluk, liu-liu governu sira nebe uluk fo tulun ba Indonesia atu invade Timor-Leste (hanesan Amerika, Australia no Inglatera).

*Masakre Santa Cruz  
12 Novembru 1991*



Krimes kontra humanidade mak krimes nebe halao ho sistematiku hanesan masakre mak halakon dignidade no direitu fundamental humanidade no sosiedade ida.



Tamba ne'e, ita bele dehan katak, krimes kontra humanidade laos kontra Timor-oan deit, maibe kontra povo hotu iha mundo - humanidade tomak mos sai vitima.

## Unidade Krimes Grave (SCU)



SCU nudar institusaun ida nebe mak ONU hari atu tau matan no investiga krime boot nebe akontese durante tinan 1999. SCU haruka ninia akuzasaun ba Tribunal Painel Espesial, nebe iha knaar atu julga akuzasaun sira ne'e.

Tribunal painel espesial halao ho juiz internasional nain rua no juiz Timor-oan nain ida. Oras ne'e dadaun SCU hatama ona akuzasaun ba ema nain 303 mak hela Timor nia liur, 40 mak hanesan membrus militar ema Indonesia, 60 militar ema Timor-oan no sira seluk mak hanesan milisia. Iha Timor Leste painel espesial halao ona julgamentu ba ema nain 76 no sira agora dadaun hela iha komarka Dili. Ema nain 317 mak agora dadaun halao hela prosesu julgamentu iha Timor Leste.



Problema katak Tribunal painel espesial la iha kapasidade atu julga no kaer ema iha Indonesia, tamba governu Indonesia la konkorda ho Painel ne'e. Iha parte seluk luta atu lori krimenozu boot sira, hanesan Wiranto no jeneral sira seluk, la hetan suporta politika husi ONU no mos husi nain ulun Timor-Leste.

Misaun ONU iha Timor-Leste atu ramata fulan Maio tinan ne'e, no seidauk klaru saida mak sei akontese ho prosesu atu hetan justisa iha Timor. Se mak atu julga kriminozu sira nebe hela iha Indonesia? Se mak atu hare ba krimes nebe halao durante tinan 1975 too 1998?

## Tribunal AdHoc



Governu Indonesia la fo suporte ba SCU, tamba dehan katak Indonesia mak tenke julga ninia ema. Entaun sira hari'i tribunal Ad Hoc atu julga krime nebe akontese iha tinan 1999. Resultadu tribunal ida ne'e katak la iha militar Indonesia ida mak hetan salan ba krimes iha 1999. Prosesu ida ne'e hatudu tan katak governu Indonesia la iha hakarak atu lori justisa ba oin.



## Saida Mak Tribunal Internasional?

Tribunal Internasional mak tribunal independente nebe ONU mak tenki hari'i, ho suporta husi komundade internasional. Tribunal internasional iha mandatu atu kaer no halo julgamentu ba ema iha nebe deit, no juis internasional sira mak sei halo julgamentu. Tribunal internasional

diak liu labele tau iha Timor Leste ka Indonesia maibe tau iha nasaun ida ke netral no besik ba rai rua ne'e.

Iha difikuldade barak atu hari tribunal internasional:

Ida, tamba rai barak nebe iha poder iha ONU nia laran la iha interese atu hari tribunal internasional. Sira dehan katak tribunal internasional hasai osan barak. Maibe, tamba sa mak governu sira hakarak hasai osan barak atu suporta funu Amerika iha Irak no iha fatin barak?



Seluk, tamba governu Indonesia no governu Timor-Leste nian dehan tiha ona katak, sira lakohi hatan ba tribunal internasional.

Ita mos hatene katak, susar ba Timor-Leste atu hasoru mesak governu Indonesia kona ba justisa. Maibe ONU no komunidadade internasional bele hasoru governu Indonesia kona ba justisa. Neduni, Governu Timor Leste presiza koopera hamutuk ho ONU no komunidadade internasional.

### **Perguntas ba Diskusaun:**

- 1.** Justisa siknifika saida ba ita boot sira nia moris?
- 2.** Ita senti ka lae, povu Timor hetan ona justisa kona ba krime nebe halao duranti tempu Indonesia?
- 3.** Sei la iha justisa, ita boot sente triste ka hirus? Tanba-sa?
- 4.** Lider balu hakarak promote rekonsiliasaun duke Justisa, oinsa ita boot sira nia hanoin?